




Kodak Color Control Patches



67781

傳664.01

858

元遠山芝全年漢



#92058

1047

元
遠
山
年
譜

國 1 册 書号 13663

元遠山先生年譜

元遺山年譜

67781

元遺山先生年譜卷一

金章宗明昌元年庚戌

月 日生

大興翁方綱編



元郝經遺山先生墓銘先生諱好問字裕之太原秀

容人系出拓跋魏故姓元氏集中自注云余家自五代以後自汝州遷平定

宋末又自平定遷於忻故文字中以平定為鄉郡○方綱按此云宋末謂靖康末也曾大父春

忠顯校尉隰州團練使大父滋善儒林郎銅山府君

贈朝列大夫父格顯武將軍鳳翔府路第九處正將

元遺山先生年譜卷一

一 粵雅堂叢書

元遺山先生年譜



兼行隴城縣令騎都尉河南縣開國男食邑三百戶
妣河南縣君張氏

南冠錄引予以始生之七月出繼叔氏隴城府君方
綱按江都郭氏金詩注云其叔父令陵川時尙未以
先生爲子誤也

方綱又按金史文藝傳元德明累舉不第放浪山水
閒飲酒賦詩以自適年四十八卒有東巖集三卷子
好問最知名此先生本生父所謂東巖府君是也郝
經遺山先生墓銘云父格顯武將軍鳳翔府路第九

處正將兼行隴城縣令此先生之繼父所謂隴城府
君是也先生集中爲第四女配壻祭廟文云敢告於
顯伯考贈中順大夫東巖府君顯妣河南郡太君
王氏顯考廣威隴城府君顯妣河南縣太君張氏極
爲分明而郭氏金詩乃以東巖隴城爲一人且謂元
格字德明直標其東巖詩曰元格詩若干首訛也乾
隆己酉夏武林王君倣以金詩原鈐板屬方綱覆校
因爲改正之

南冠錄引先祖銅山府君正隆二年贈出身訖正大

之末吾家食先朝祿七十餘年矣

二年辛亥

二歲

三年壬子

三歲

四年癸丑

四歲

南冠錄引予自四歲讀書

五年甲寅

五歲

濟南行記云子兒時從先隴城府君官掖縣

嘗過濟南方綱按先生乙未歲濟南雜詩云四十二年彈指過則其隨隴城君至濟南在四五歲時也

六年乙卯

六歲

承安元年丙辰

七歲

能詩有神童之目 墓銘云太原王湯臣稱

爲神童

二年丁巳

八歲

南冠錄引云八歲學作詩

三年戊午

九歲

四年己未

十歲

五年庚申

十一歲

之爲文

泰和元年辛酉

十二歲

二年壬戌

十三歲

是年趙秉文遷翰林修撰

十月十日翰

林修撰王庭筠卒年五十二先生於癸丑歲爲作墓

碑

三年癸亥

十四歲

中州集郝先生天挺小傳云好問十四歲

先人令陵川時從先生學舉業先生工於詩時命好

問屬和

先生所爲郝先生墓銘云泰和初先人調

官中都某甫成童習舉業先人思所以引而致之者

謀諸親舊閒皆曰濩澤風土完厚人質直而尚義爲子求師莫此州爲宜於是先人乃就陵川令之選時鄉先生郝君方教授縣庠某從之學先生教之曰學者貴其有受學之器器者何慈與孝也又曰今人學詞賦以速售爲功六經百氏分裂補綴外或篇題句讀之不知幸而得之且不免爲庸人况一敗塗地者乎先人旣罷官某留事先生又二年然後歸

四年甲子

十五歲 通真子墓碣先君子合陵川子始成童

續夷堅志先人宰陵川泰和甲子元夕縣學燒燈有以杏棣棠折枝爲翦綵花者燈罷家僮乞之供於縣署佛屋中四月上七夜先夫人焚誦次乃見杏棠皆作花真贗相閒先人會賓示之以爲文字之祥爲賦瑞花詩予年始十五矣

五年乙丑

十六歲 中州集小傳兄敏之諱好古年二十就科舉時先東巖君已捐館太夫人年在喜懼望其立門戶甚切云云据此先生父東巖君歿當在乙丑年

是年赴試并州道逢捕雁者云今日獲一雁殺之矣
其脫網者悲鳴不能去竟自投於地而死予因買得
之葬之汾水之上累石爲識號曰雁邱併作雁邱詞
六年丙寅

十七歲

七年丁卯

十八歲 天慶觀記云予嬰年先大父挈之四方十
八乃一歸始聞鄉里談天慶異事每歲二月望有鶴
降此殿多至十數從是予兩見之特亂後鶴乃不至

耳 南冠錄引十八歲先府君教之民政

八年戊辰章宗崩衛王永濟立

十九歲 學於郝天挺六年而業成

衛紹王大安元年己巳

二十歲 兩山行記云先東巖君生平愛鳳山

鳳皇山在

雁門然竟不一到故詩有鳳皇聞說似天壇北去南來
馬上看想得松聲滿巖谷秋風無際海波寒之句子
二十許時自燕都試乃與客登南樓亡友蘇莘老閣
德潤張九成王仲容輩說山中道人所居有松風軒

層簷高棟半出空際長松滿礪谷如雲幢烟蓋植立
闌楯之下山空夜寂石上聞墜露聲使人耿耿不寐
一統志繫舟山在太原府城東北九十里禹治水
繫舟此山故名有石如環軸曰繫舟鬼元好問父德
明讀書其下趙秉文改曰讀書山好問詩從此晉陽
方志上繫舟山是讀書山

是年十月趙秉文出爲寧邊州刺史

送秦中諸人引云予年二十許時侍先人官畧陽以
秋試留長安

二年庚午

二十一歲 先生父隴城君卒於官先生扶護歸里
趙秉文改平定州刺史

三年辛未

二十二歲

是年九月翰林學士承旨党懷英卒年七十八

崇慶元年壬申

二十三歲

是年麻徵君九疇卒年五十

至甯元年癸酉八月胡沙虎弑衛紹王立昇王珣九月
以後爲宣宗貞祐元年

二十四歲

是年趙秉文轉翰林直學士

二年甲戌五月徙都汴秋七月蒙古復圍燕

二十五歲 曲阜紀行詩云誰言甲戌亂煨燼入炎

燎 梁園春五首注車駕還汴京後作 答聰上人

書云僕自貞祐甲戌南渡江時犬馬之齒二十有五

遂登楊趙之門所與交如辛敬之雷希顏王仲澤李

欽叔麻知幾諸人其材量文雅皆天下之選

是年三月兄敏之歿于北兵屠城之禍年二十九

十七史蒙求序始予年二十餘住太原學舍交城吳

君庭秀洎其弟庭俊與予結夏課於由義西齋嘗以

所撰蒙求見示後三十七年過鎮陽因得而序之

三年乙亥五月中都留守左丞相完顏承暉自殺蒙古

遂入燕焚宮室火月餘不滅

二十六歲

南冠錄引因循二三年中原受兵避寇陽曲秀容之

閒歲無甯居

四年丙子

二十七歲 先生自秀容避亂河南客居崧山 夏五月將南渡河道出虞坂作虞坂行 孫伯英墓銘云貞祐丙子子自太原南渡因得過伯英家登壽樂堂飲酒賦詩 故物譜貞祐丙子兵後予將奉先夫人南渡河雜書及先人手寫春秋三史莊子文選之等尚千餘冊并畫百軸載二鹿車自隨是歲寓居三鄉其十月北兵破潼關避於女兒之三潭

趙秉文除侍講學士

興定元年丁丑

二十八歲 在三鄉作論詩絕句 錦機引興定丁丑閒居汜南始集前人議論為一編以便觀覽蓋就李嗣榮衛昌叔家所有書而錄之故未備也因以錦機名之十一月日河東元某自題

二年戊寅

二十九歲

三年己卯金築汴京裏城

三十歲

四年庚辰

三十一歲 六月與趙郡李獻能太原王渥同遊玉華谷憩少姨廟先生周行廊廡得古仙人詞於壁間其首章直屋漏雨爲所漫剝殆不可辨乃磴木石而上拂拭汎滌迫視者久之始可完讀 西園詩注興定庚辰八月中作 太原貢士南京狀元樓宴集題名引云今年預秋賦者百人

五年辛巳

三十二歲 登進士第不就選 堯山堂外紀興定初裕之始以詩文見閒閒公公爲延譽諸公閒又五年乃得以科第出公之門

元光元年壬午

三十三歲

二年癸未十一月宣宗崩子守緒立

三十四歲 過鄆城見麻徵君知幾 校笠澤叢書後記云子家舊有二本一本是唐人竹紙番複寫元光閒應詞科時買於相國寺販肆中宋人曾校定塗

抹稠疊殆不可讀

哀宗正大元年甲申

三十五歲 堯山堂外紀裕之出閑閑公之門旁有
不平者謂公與楊禮部之美雷御史希顏李內翰欽
叔爲元氏黨人正大甲申諸公貢裕之詞科公爲監
試官以例不赴院宿一日坐禮曹欽叔從外至誦裕
之秦王破竇建德降王世充露布是年應詞科程文
秦王擒竇建德王
世充露布今載集中餘二篇光武中
與頌大司農箴其文已亡集所不載公頗爲聳動顧
座客陳司諫正叔曰人言我黨元氏誠黨之邪 劉

祁歸潛志云正大初先子令葉又云正大初先子入
翰林又云正大初趙閒閒長翰苑同陳正叔常仲明
雷希顏元裕之諸人作詩會

趙秉文改翰林學士修國史

二年乙酉

三十六歲 吏部掾屬題名記末云正大二年五月
日儒林郎權國史院編修官元某記警巡院廨署記
末亦同 六月十一日雨詩一旱近兩月河洛東連
淮 木庵詩集序乙酉冬十月將歸太原侍者出木

庵集求子爲序 太原昭禪師語錄引云正大初子
在史館

三年丙戌

三十七歲 夏四月過汜南爲郟城張良佐作古鏡
銘 除夜詩三十七年今日過

四年丁亥

三十八歲 長慶泉新廟記云正大丁亥予承乏是
邑謂內鄉夏五月赤旱近百日 與張仲經同賦觀浙

江漲詩云一旱千里赤一雨垣屋敗浙故以江名暴

與衆鑿會 九日讀書山詩云我在正大初作吏浙

江邊山城官事少日放浙江船

五年戊子

三十九歲 正月晦日內鄉西城遊眺詩 紀夢詩

注七月二十四日內鄉往盧氏宿走馬平夜夢拜天
帝像遂觀法駕導引畫幄最前負弩三人中有金書
小字題裕之者夢中不自知其爲予也 行齋賦序

戊子冬十月長壽新居成仲經張君從予卜鄰取君
子素位而行之義名曰行齋而乞文於予 張仲經

詩集序予官西南張仲經偕杜仲梁麻信之高信卿
康仲甯挈家就予內鄉時劉內翰光輔方解郡州俸
日得相從文字間是年出居縣西南白鹿原名所居
爲行齋齋南菊水湍流綠莎盈尺臈月紅梅盛開諸
公藉草而坐嘯詠彌日 方綱嘗得先生手書涌金
亭詩石刻後題云己酉清明日崧陽王贊立石按涌
金亭示同遊諸君子七言古詩卽在正大戊子冬罷
內鄉時也其云己酉者後來所補刻耳 新齋賦序
予旣罷內鄉出居縣東南白鹿原結茅菊水之上聚

書而讀之其久也優柔厭飫若有所得以爲平生未

嘗學學於是乎始乃名所居爲新齋

方綱按白鹿原同見本集而一

稱縣西南一稱縣東南當有一誤

是年八月七日翰林學士楊雲翼卒年五十九先生

作神道碑銘云公文章與閑閑公齊名世號楊趙

六年己丑

蒙古太宗之元年

四十歲 鎮平縣齋感懷云四十頭顱半白生 阿

干始生詩云四十舉兒子

方綱按先生先官於內鄉後乃官鎮平官南陽以本

集考之甚明而郝經爲先生墓銘序云初筮仕除鎮平令再轉內鄉遂丁艱終喪正大中辟鄧州南陽令轉內鄉令蓋攷之未詳也金史文藝傳敘內鄉令在正大之前亦誤近日長洲顧嗣立元百家詩小傳又敘內鄉於南陽之後亦沿郝氏銘序之訛耳顧氏小傳又沿郝銘之訛作興定三年進士皆宜改正

七年庚寅

四十一歲

八年辛卯

四十二歲 時爲南陽令 宛邱歎注云辛卯七月

農司檄予按秦陽陂田 中州集小傳辛卯秋季長

源過予襄城杯酒閒誦關中往來詩

是年十一月劉祁至汴京

天興元年壬辰

正大九年正月改元開興四月又改元天興

正月蒙古遣其

將速不臺圍金汴京金遣曹王爲質四月蒙古退軍河

洛十二月汴京糧盡援絕哀宗出奔河北速不臺復圍

汴

四十三歲

墓銘云天興初入翰林知制誥 本傳

云天興初擢尙書省掾頃之除左司都事轉行尙書

省左司員外郎

方綱按此蓋舉一二
年間之除授統言之

集中詩云壬辰困重圍本傳云今所傳者有壬辰雜

編若干卷 十二月車駕東狩後卽事詩 堯山堂

外紀壬辰北渡順天毛正卿楊德秀祈仙山寺中蘇

晉降筆寫詩數十首一詩有百僞無一真中有羲黃

醇之句餘詩除酒裏神仙我五言外多不成語二人

初不知晉爲何代人詩爲何人作以語元遺山遺山

曰余三十六七時有詩曰西郊一畝宅閉門秋草深

牀頭有新釀意慳成孤斟舉杯謝明月蓬華肯相臨

願將萬古色照我萬古心又去古日已遠百僞無一

真獨餘酒鄉地中有羲黃醇聖教難爲功乃見酒力

神誰能釀滄海盡醉區中民今晉所批乃有此十字

晉豈余前身邪將近時鬼物之不昧者記余詩託名

於晉以自神也晉旣以余詩爲渠所作余亦就酒裏

神仙我五言取償於晉因作樂府曰繡佛長齋枉伴

蒲團過酒壚橫臥一蹴虛空破笑張顛自謂無人和

還知麼醉鄉天大小箇神仙我 南冠錄引京城之

圍予爲東曹都事知舟師將有東狩之役言於諸相請小字書國史一本隨車駕所在以一馬負之時相雖以爲然而不及行 范陽張公先德碑予在大梁承乏左曹都司壬辰之圍外援阻絕危急存亡朝不及夕或有言宿州節度宗室衆僧奴之幕客張子良由閒道賫奏牘至者卽日召對書詔誥凡繫之左曹者予得與聞之

是年五月十二日密國公璿薨年六十一 五月十

二日翰林學士趙秉文卒年七十四 歸潛志卒于夏四月年七十三

疑有誤

趙閑閑贊引云壬辰冬某以東曹掾知雜權

都司取行止卷觀之見公獨銜及楊雷猥相薦引者十七章 是年權陝府行省左右司郎中河中李獻能欽叔以陝亂見殺年四十一中州集小傳在京師時希顏仲澤欽叔京父相得甚懽希長子六歲澤長四歲欽與京少子二歲希歿於正大辛卯之八月年四十八澤歿於明年之七月年四十七欽歿於其年十一月年四十一京歿於又明年之三月年四十二蓋不二三年而五人者惟不肖在爾

雷淵字希顏渾源人翰林修撰

王渥字仲澤太原人權右司郎中冀
禹錫字京父龍山人左右司都事

傷寒會要序壬辰之兵鎮人李杲明之與予同出汴

梁於聊城於東平與之游者六年

方綱按此亦統指
以下數年而言其

實於癸巳
出汴也

壽陽縣學碑陰記壬辰之冬薄遊燕趙齊魯閒迹益
窮文益奇名益大振每一篇出京師爲之紙貴故所
至以異人目之

元遺山先生年譜卷一

譚瑩玉生覆校

元遺山先生年譜卷二

大興翁方綱編

二年癸巳正月丙午朔哀宗濟河戊辰

是二十三日

汴京西

面元帥崔立作亂殺參知政事完顏奴申樞密副使完

顏斜檢阿不立衛王子從恪爲梁王監國以城降蒙古

四十四歲 通鑒初汴人以金主親出師日聽捷報

及聞軍敗始大懼時速不臺攻城日急內外不通及

金主遣使至汴奉迎兩宮人情益不安西面元帥崔

立性淫狡因民洶洶潛謀作亂左司都事元好問謂

斜捻阿不曰自車駕出京今二十日許又遣使迎兩
宮民間皆謂國家欲棄京城相公何以處之斜捻阿
不曰吾二人惟有一死爾好問曰死不難誠能安社
稷救生靈死可也如其不然徒欲以一身飽五千紅
納軍亦謂之死邪斜捻阿不答時兩宮已出至陳
留見城外二三處火起疑有兵復馳還汴京明日崔
立拔劍指完顏奴申及斜捻阿不曰京城危困已極
二公坐視何也二相曰有事當好議之何遽如是立
麾其黨先殺斜捻阿不次殺奴申及左司郎中納合

德輝等十餘人卽諭百姓曰吾爲二相閉門無謀今
殺之爲汝一城生靈請命衆皆稱快立遂勒兵入宮
集百官議所立立曰衛紹王太子從恪其妹公主在
北兵中可立之乃遣其黨韓鐸以太后命往召命爲
梁王監國百官拜舞立自爲太師都元帥尙書令鄭
王弟倚爲平章政事侃爲殿前都點檢其黨皆拜官
元好問亦爲左右司員外郎遂送款詣速不臺軍速
不臺至青城立服御衣儀衛往見之速不臺喜飲之
酒立以父事之還城悉燒樓櫓以荆王府爲私第取

內府珍玩充實之 金史王若虛傳崔立變羣小附和請為立建功德碑翟奕以尙書省命召若虛為文時奕輩恃勢作威人或少忤則讒構立見屠滅若虛自分必死私謂左右司元好問曰今召我作碑不從則死作之則名節掃地矣不若死之為愈雖然我姑以理論之乃謂奕輩曰丞相功德碑當指何事為言奕輩怒曰丞相以京城降活生靈百萬非功德乎曰學士代王言功德碑謂之代王言可乎且丞相既以城降則朝官皆出其門自古豈有門下人為主帥誦功德而可信乎後世哉奕輩不能奪乃召太學生劉祁麻革輩赴省好問張信之喻以立碑事曰眾議屬二君且已白鄭王矣二君其無讓祁等固辭而別數日促迫不已祁即為草定以付好問好問意未愜乃自為之既成以示若虛乃共刪定數字然止直敘其事而已後兵入城不果立也

郭元鈺金詩紀事遺山秋夜詩九死餘生氣息存蕭條門巷似荒邨春雷漫說驚塚戶皎日何曾入覆盆濟水有情添別淚吳雲無夢寄歸魂百年世事兼身

事尊酒何人與細論此詩爲汴京之難言之也据金
史文藝傳則當時碑文皆以爲裕之所作其不免於
物議可知詩中悲銜坏戶冤抱覆盆所以歎息於告
語之無人也然意含蓄未露其痛切言之者則見於
集中外家別業上梁文及元郝經伯常辨磨甘露碑
詩外家別業上梁文云遺山道人蟬蠹書癡雞蟲祿
薄猥以勃窣槃踟之迹仕於危急存亡之秋左曹之
斗食未遷東道之戈船已御久矣公私之俱罄困於
春夏之長圍窮甚析骸死惟束手人望荆兄之通好

義均紀季之附庸出涕而女於吳莫追於既往下車
而封之杞有覲於方來謀則僉同義當孰抗爰自上
書宰相所謂試微軀於萬仞不測之淵至於喋血京
師亦常保百族於羣盜垂涎之口皇天后土實聞存
趙之謀枯木死灰無復哭秦之淚初一軍構亂羣小
歸功劫太學之名流文鄭人之逆節命由威制佞豈
願爲就磨甘露御書之碑細刻錦溪書叟之筆蜀家
降表具存李昊之世修趙王禪文何預陸機之手迹
文選謝平原內史表伊誰受賞於我嫁名悼同聲同氣之間有

無罪無辜之謗耿孤懷之自信聽衆口之合攻果吮
癰舐痔之自甘雖竄海投山其何恨惟彼證龜而作
鼈始於養虺以成蛇追韓之騎甫還射羿之弓隨鼓

予北渡之初獻書中令君請以一寺觀所費養天
下名士造謗二三集謝本非亦書中枚舉之類也

流言之自止知神理之可憑復齒平民僅延殘喘澤
畔而湘纍已老樓中而楚望奚窮云云案中云左
曹之斗食未遷時裕之尙官左司都事其後梁王監
國始遷左右司員外郎也東道之戈船已御時天興
元年春元兵已駐鄭州海灘寺進攻汴京也方綱按
此是前

一年圍城數月外援莫至奴申乞和訛可出質方綱按
此

在前一年請罷攻而不得議親捍而大奔車駕蒙塵

輿情無主衆欲推立荆王守純以城降元如春秋紀
季入齊之義所謂人望荆兄之通好義均紀季之附
庸也其時裕之實請於奴申與阿不欲立監國以全
兩宮與皇族翌日而乃有崔立之變二相被殺故有
上書宰相喋血京師存趙有謀哭秦無淚之歎也至
云劫太學之名流文鄭人之逆節似乎當時碑文仍
出劉京叔手苟如史所云好問意未愜乃自爲之則

安得復云蜀家降表具存李昊之世修趙王禪文何
預陸機之手迹耶慨受賞者有人悲嫁名爲無罪乍
返追韓之騎已關射羿之弓其言隱痛必有所指注
中所云造謗二三者俟更考之又按注中所云中令
君蓋耶律楚材也楚材爲右丞文獻公履之第三子
仕元爲天興二年於元爲太宗之五年時汴京變後
南中士大夫歸河朔者所在有之故裕之寓書楚材
請以一寺觀費養天下名士也

某謹齋沐獻
書相公閣下

書中所枚舉者自耆舊如馮內翰叔獻

書首云四月二十有
二日門下士太原元

梁都運斗南高戶部唐卿王延州從之四人外時輩
爲平陽王狀元綱東明王狀元鶚濱人王賁臨淄人
李浩秦人張徽楊煥然李庭訓河中李獻卿武安樂
夔固安李天翼沛縣劉汝翼齊人謝良弼鄭人呂大
鵬山西魏璠澤人李恆簡李禹翼燕人張聖俞太原
張緯李謙冀致君張耀卿高鳴孟津李蔚真定李治
相人胡德珪易州敬鉉雲中李微中山楊果東平李
彥西華徐世隆濟陽張輔之燕人曹居一王鑄渾源
劉祁及其弟郁李全平定賈廷揚楊恕濟南杜仁傑

洛水張仲經虞鄉麻革東明商挺漁陽趙著平陽趙維道汝南楊鴻河中張肅河朔句龍瀛東勝程思温及其從弟思忠共四十九人內劉麻二人之名皆在焉然則所云造謗二三得毋卽指之耶但裕之與信之素厚內鄉隱居河汾投老始終未嘗有閒京叔父子兄弟其始亦極爲裕之所推許卽晚歲輯中州集時論次雲卿蓬門先生集中詩尙云二子祁郁俱有名於時未聞有所譏貶如文中養虺成蛇彀弓射羿何甚也然猶稱之曰名流不斥其人也諉之曰劫明

其非得已也復爲之解曰命由威制則又似乎京叔之撰文翟奕張信之輩實使裕之促之者更爲之解曰佞豈願爲又似乎京叔屬草之後裕之亦嘗畧爲刪改者後乃盡舉其過歸之一人是以悼同聲同氣之間有無罪無辜之謗也又郝經陵川集辨磨甘露碑云國賊反城自爲功萬段不足仍推崇勒文誦德召學士滹南先生付一死林希更不顧名節兄爲起草弟親刻省前便磨甘露碑書丹卽用宰相血百年涵養一塗地父老來看闍流涕數罇黃封幾斛米賣

却家聲都不計盜據中國責金源吠堯極口無覲顏
作詩爲告曹聽翁且莫獨罪元遺山按遺山集內翰
王公墓表云天興初冬十二月車駕東狩明年春正
月京城西面元帥崔立劫殺宰相送款行營羣小獻
詔請爲立建功德碑以都堂命召公爲文喋血之際
翟奕輩恃勢作威頤指如意人或稍忤則橫遭讒構
立見屠滅公自分必死私謂好問言今召我作碑不
從則死作之則名節掃地貽笑將來不若死之爲愈
也雖然我姑以理論之乃謂奕輩言丞相功德碑當

指何事爲言奕輩怒曰丞相以京城降城中人百萬
皆有生路非功德乎公又言學士代王言功德碑謂
之代王言可乎且丞相旣以城降則朝官皆出丞相
之門自古豈有門下人爲主帥誦功德而爲後人所
信者問答之次辭情閒暇奕輩不能奪意脅太學生
託以京城父老意而爲之則碑文之出於劉京叔手
可知伯常詩中勒文誦德召學士淳南先生付一死
謂王從之能顧名節也林希更不顧名節兄爲起草
弟親刻豈於時京叔撰文其弟文季亦在圍城中便

爲之上石耶書丹卽用宰相血傷奴申阿不之見殺也父老來看閻流涕明非京城父老意也數罇黃封幾斛米卽遺山上梁文所云受賞也賣却家聲都不計當以二劉之高祖南山翁撝從曾祖西巖老人汲父御史從益於金源氏百年以來世爲高門今乃以此墮其家聲爲可惜也但林希二字殊不可解或以麻字之減文爲林信之自號貽溪復以貽溪之反語爲希邪信之爲秉彝之孫亦有家聲但與詩所云兄弟者不合或卽爲信之語以起草讓京叔而以刻石

自任耶

方綱按此指麻貽溪非是宋徐自明宰輔編年錄紹聖四年閏二月林希同知樞密院事

林希字子中福州人先是元祐中除希中書舍人爲孫升劉摯諸御史所論出知蘇州至是章惇入相思甘心於元祐故臣命詞掖當求以爲元祐敵者乃進希寶文閣直學士自毫社易知成都希旣過闕惇首卜其所向果怨元祐者卽白留希爲中書舍人遂兼侍讀希命詞宣力爲多希又修神宗國史時方推明紹述盡黜元祐諸臣自呂大防劉摯蘇軾蘇轍等書命皆希爲之惇仍許以爲同執政一日希草制罷擲筆於地曰壞了名節矣遷吏部尙書翰林學士拜同知樞密院事据此似是借宋事爲影喻蓋林希有壞了名節一語故借用其事也末云作詩爲告曹聽翁且莫獨罪元

遺山則所以爲裕之訟冤者雖切然亦未嘗謂不與其事者蓋裕之之自尙書省掾左右司員外郎實爲

崔立所署其受謗亦未爲無因也

方綱按集中壬辰十二月車駕東狩後卽事詩已云戴盆鬱鬱夢瞻天又云慘澹龍蛇日鬪爭干戈真欲盡生靈又云精衛有冤填瀚海包胥無淚哭秦庭是皆關心國是之言豈卽預知次年正月事耶則先生之志不在區區爲一己出處申辨可知已又按薛應旂續通鑑載此事於金史王若虛傳然以其事核之互有不合如傳云後兵入城碑不果立哀宗本紀二年正月戊辰安平都尉京城西面元帥崔立舉兵爲

亂癸酉大元帥碎不斛進兵汴京戊辰是正月二十三日癸酉是二十八日中間止有四日耳而云碑不果立又云促迫數日則郝詩何以有起草親刻父老來看之語乎而所謂極口吠堯則亦與若虛傳所云止直敘其事者不符矣且先生四月二十九日出京則在城中遇崔立之亂凡三閱月而云斗食未遷則其署官先生固若不預也者且若虛傳中始而敘若虛私謂左右司員外郎元某則似已在署官員外之後矣及至若虛辭後乃召太學生至省而元某喻以

立碑事則仍在尙書省又似在未署官之前前後情
事亦不相合况本傳既表若虛之辭大金國志亦謂
若虛外爲遜辭實欲以死守之時議稱焉而此傳又
謂好問自爲碑旣成以示若虛乃共刪定數字言共
刪定則若虛亦在其中而何以謂時議稱之哉然則
此事史所載已參錯難曉而郝詩云且莫獨罪尙是
渾淪之詞耳癸巳年郝伯
常年十一歲
明儲太僕靜夫巵題重刻集後云或者謂金之亡崔
立之變死生辭受之際遺山處之有不能道人之議

者噫是未考也觀其對捏申之語誌聶女之墓隱忍
激烈意蓋有待而爲也方綱按遺山集聶孝女墓銘
云五臺聶天驥元吉爲尙書左右司員外郎壬辰之
冬車駕東狩元吉留汴梁明年正月二十有三日崔
立舉兵反殺二相省中元吉被兵創甚女日夜悲泣
謁醫者療之百方至刲股雜他肉以進而元吉卒不
可救女葬其父之明日乃絕脰而死女字舜英年二
十二嘗嫁爲進士張伯豪妻伯豪死歸父母家嗚呼
壬辰之亂極矣中國之大百年之久其亡也死而可

書者權參知政事翰林學士承旨子政右丞大用御
史大夫仲甯戶部尙書仲平大理德輝點檢阿撒郎
中道遠省講議仁卿奉御忙哥宰相子伯祥宿直將
軍長樂妻明秀參知政事伯陽之夫人與孝女十數
人而已且有婦人焉孝女合葬張氏墓銘有銘以表
之并志予媿之句先生之闡揚孝烈可謂至矣金史
哀宗紀是日死難者右副點檢溫敦阿里左右司員
外郎聶天驥御史大夫裴蒲阿虎帶諫議大夫左右
司郎中烏古孫奴申左副點檢完顏阿散奉御忙哥
講議蒲察琦而先生所記死事諸人雖以壬辰渾舉
之而其發潛表忠之意固有可與史相證者且左右
司員外者卽史所稱崔立署好問之官而聶天驥實
以是官死若先生稍有依違於中甯不避言此官而
直書特書則先生之心足以對人可知矣又南冠錄
引云崔立之變歷朝實錄皆滿城帥所取百年以來
明君賢相可傳後世之事甚多不三二十年則世人
不復知之矣此其雜見於先生集中者痛切言之不
啻再四借使史所書署官之言果有其事亦必崔黨

畏先生名重署之官以自爲地與先生固無預而况
史所載多參錯致疑哉此予所以反覆致辨於癸巳
春署官一節之未足深論也

方綱又按崔立碑事始末具詳於劉祁歸潛志第十
二卷今全錄於此錄崔立碑事崔立旣變以南京降
自負其有救一城生靈功謂左司員外郎元裕之曰
汝等何時立一石書吾狀耶時立國柄入手生殺在
一言省庭日流血上下震悚諸在位者畏之於是乎
有立碑頌功德議數日忽一省卒詣子家賫尙書禮

房小帖子云首領官召赴禮房余初愕然自以布衣
不預事不知何謂卽往至省門外遇麻信之余因語
之信之曰昨日見左司郎中張信之言鄭王碑事欲
屬我輩作豈其然耶卽同入省禮房省掾曹益甫引
見首領官張信之元裕之二人曰今鄭王以一身救
百萬生靈其功德誠可嘉今在京官吏父老欲爲立
碑紀其事衆議屬之二君且已白鄭王矣二君其無
讓余卽辭曰祁輩布衣無職此非所當爲况有翰林
諸公如王丈從之及裕之輩在祁等不敢裕之曰此

事出於衆心且吾曹生自王得之爲之何辭君等無讓余卽曰吾當見王丈論之裕之曰王論亦如此矣子卽趨出至學士院見王丈時修撰張子忠應奉張元美亦在焉余因語其事且曰此實諸公職某等何與焉王曰此事議久矣蓋以院中人爲之若尙書檄學士院作非出於在京官吏父老心若自布衣中爲之乃衆欲也且子未仕在布衣今士民屬子子爲之亦不傷於義也予於是陰悟諸公自以仕金顯達欲避其名以嫁諸布衣又念平生爲文今而遇此患難以是知揚子雲劇秦美新其亦出於不得已耶因遜讓而別連延數日又被督促知不能辭卽畧爲草定付裕之一二日後一省卒來召云諸宰執召君子不得已赴省途中遇元裕之騎馬索子因劫以行且拉麻信之俱往初不言碑事止云省中召王學士諸公會飲子亦陰揣其然旣入卽引詣左參政幕中見參政劉公謙甫舉杯屬吾二人曰大王碑事衆議煩公等公等成之甚善余與信之俱遜讓曰不敢已而謙甫出見王丈在焉相與酬酢酒數行日將入矣余二

人告歸裕之曰省門已鎖今夕卽當留宿省中余輩無如之何已而燭至飲余裕之倡曰鄭王碑文今夕可舉手也余曰有諸公在諸公爲之王丈謂余曰此事鄭王已知衆人請太學中名士作子如堅拒使王知書生輩不肯作是不許其以城降也則銜之刻骨縉紳俱受禍矣是子以一人累衆也且子有老祖母老母在堂今一觸其鋒禍及親族何以爲智子熟思之余惟以非職辭久之且曰余旣爲草定不當諸公意請改命他人諸公不許促迫甚余知其事無可奈何則曰余素不知館閣體今夕諸公共議之如諸公避其名但書某名在諸公後於是裕之引紙落筆草其事王丈又曰此文姑使裕之作以爲君作又何妨且君集中不載亦可也余曰裕之作政宜某復何言碑文旣成以示王丈及余信之欲相商評王丈爲定數字其銘詞則王丈裕之信之及存余舊數言其碑序全裕之筆也然其文止實敘事亦無褒稱立言時夜幾四鼓裕之趣曹益甫書之裕之卽於燭前焚其稿遲明余輩趨出後數日立坐朝堂諸宰執首領官

元道山先生年譜卷二
三
共獻其文以爲壽遂召余信之等俱詣立第受官余
輩深懼見立俄而諸首領官賫告身三通以出付余
輩曰特賜進士出身因爲余輩賀後聞求巨石不得
省門左舊有宋徽宗時甘露碑有司取而磨之工書
人張君庸者求書刻方畢北兵入城縱剽余輩狼狽
而出不知其竟能立否也嗟乎諸公本畏立禍不敢
不成其言已而又欲避其名以賣布衣之士余輩不
幸有虛名一旦爲人之所切欲以死拒之則發諸公
嫁名之機諸公必怒怒而達崔立禍不可測則吾二

親何以自存吾之死所謂自經於溝瀆而莫之知且
輕殺吾身以憂吾親爲大不孝矣况身未祿仕權義
之輕重親莫重焉故余姑隱忍保身爲二親計且其
文皆衆筆非余全文彼欲嫁名於余余安得而辭也
今天下士議往往知裕之所爲且有曹通甫詩楊叔
能詞在亦不待余辨也因書其首尾之詳以誌年少
之過空山靜思可以一笑右神川遜士劉祁所作歸
潛志述崔立碑事如此其言曹通甫詩楊叔能詞今
皆不見於世

因學齋雜錄曹居一字通甫一字聽翁
又號南湖散人太原人金末進士仕元

元遺山先生全集卷二 三
為行臺員外郎遺山集中
有送曹吉甫兼及通甫詩

而此碑當日為劉祁作則
無疑矣其曰今天下士議往往知裕之所為者則即

遺山上梁文所云於我嫁名者也其曰止實敘事無

褒稱立之言者則後來据以入史即今金史王若虛

傳所本也撰金史者於若虛一傳前半則依好問之

文後半則依劉祁之文是以參錯致疑也其曰銘詞

則王丈裕之信之及存余舊數言其碑序全裕之筆

是固以滹南與遺山同入事中矣而今史家於王則

稱之於元則有微詞何哉且遺山上梁文一則曰同

聲同氣之閒有無罪無辜之謗再則曰造謗二三亦

書中枚舉之類是其詞微而隱未嘗明指劉祁也而

祁歸潛志則若惟恐世之不知此事中有遺山者以

是二者較之孰為嫁名後世學人必有公論矣况郝

經詩兄弟之言已自曉然林希之稱或為度語而其

言極口吠堯則必郝目見此文安得謂之止實敘事

而已郝之詩憤此碑也非止辨此碑也如是而其出

遺山與否固不待更考矣然歸潛志既曰連延數日

又被督促又曰後數日召余輩受賞是白崔立之變

元道山先生年譜卷二
至磨碑刻詞必非戊辰至癸酉所能辦也又據史崔
立之變在兩宮歸之明日而歸潛志敘在後二日是
皆紀載之互有參錯者而歸潛志謂一時人望皆以
次遷擢臺閣中除拜無虛日又可見所謂署官者之
本屬虛妄不足道矣今歸潛志行世止八卷是以前
輩皆未見此事源委故備著而論之

集中詩云明年出青城 四月二十九日出京詩云
興亡誰識天公意留著青城閱古今自注國初取宋
於青城受降 五月三日北渡詩 南冠行癸巳秋

作 又李仲華湍流高樹圖詩自注癸巳正月之變
逆黨中有欲謀害己者賴仲華力爲營護得釋

中州集引歲壬辰予掾東曹馮內翰子駿延登劉鄧
州光甫祖謙約予爲此集時京師方受圍危急存亡
之際不暇及也明年留滯聊城杜門深居頗以翰墨
爲事馮劉之言日往來於心乃記憶前輩及交游諸
人之詩錄爲一編目曰中州集嗣有所得當以甲乙
丙丁次第之十月二十有二日

三年甲午正月戊寅哀宗傳位於東面元帥承麟哀宗

自經於幽蘭軒承麟爲亂兵所殺金亡

蒙古太宗之六年即宋理宗端

平元年

四十五歲

李俊民鶴鳴老人集金蔡州破於甲午年正月十日
己酉 清真觀記歲甲午予自大梁羈管聊城冷德
明之法兄弟房志起自覃懷來介於幕府諸君請予
爲記六月十六日前進士河東元某記 紀子正杏
園宴集 密公寶章小集詩注甲午三月爲輔之書
於聊城至覺寺之寓居 校笠澤叢書後記末云甲

午四月二十有一日書於聊城寓居之西牕 甲午

除夜詩云甲午兩周今日盡只將衰淚灑冥天蓋自

金太祖收國元年乙未至是正一百二十年也 南

冠錄引甲午羈管聊城益之兄邈在襄漢姪搏俘繫
之平陽存亡未可知伯男子叔儀姪孫伯安皆尙幼
未可告語予年已四十有五益之兄嘗命予修千秋
錄畧具次第乃手寫以備遺忘以先世雜事附焉以
行年雜事附焉以先朝雜事附焉合而一之名曰南
冠錄叔儀伯安而下乃至傳數十世當家置一通

元遺山先生年譜卷二

譚瑩玉生覆校

元遺山先生年譜卷三

大興翁方綱編

蒙古太宗七年乙未

四十六歲 正月九日立春詩 是年六月渾源劉

祁撰歸潛志 祁於甲午歲還鄉時年三十二 先生濟南行記子兒

時從先隴城君官掖縣嘗過濟南然但能憶其大城

府而已長大來聞人談此州風物之美遊觀之富每

以不得一遊為恨歲乙未秋七月子來河朔者三年

矣始以故人李君輔之故得一至焉因次第二十日

閒所遊歷初至齊河約杜仲梁俱東並道諸山南與
太山接至濟南置酒歷下亭故基亭下大明湖與濟
水合華峯東有臥牛山正東百五十里鄒平之南有
長白山范文正公學舍在焉東十里有南北兩妙山
兩山之閒有閔子騫墓西有函山太山北麓也瀑流
泉在城西南字又作
趵突靈泉庵道士留子再宿此遊至
瀑流者六七宿靈泉庵者三汎大明湖者再遂東入
水柵水名繡江發源長白山下周圍三四十里留五
日而還道出王舍人莊道旁一石刻云隋開皇丙午

馬山之南有大觀三年東平陳彥元廟記靈巖寺後
方山下有絕景亭有党承旨世傑寺記寺壁石刻甚
多有張揆叔文蘇轍子由吳拭顧道詩餘人不能悉
記遂登天門岳頂太史公謂太山雞一鳴日出三丈
而子登日觀平明見日出疑是太史公夸詞問之州
人云嘗有抱雞宿山上者雞鳴而日始出蓋岱宗高
出天半昏曉與平地異故山上平明而四十里之下
纔昧爽聞耳宋大中祥符元年十月二十七日封太
山碑刻皆王欽若陳堯叟錢惟演楊億撰述然字畫

多剝落不能完讀矣太山上書院元是周朴所居宋
太山孫先生明復居之州學有魯兩先生祠堂党承
旨作記兩先生者明復與徠先生石守道也龍泉
寺在平陰東南四十里齊天統中建寺有石刻劉豫
阜昌三年皇子皇弟符改甲乙院亦有碑又阜昌中
題名最多此行遊太山者五日靈泉龍泉皆一宿而
去得詩凡十首方綱按今靈巖寺中殿西階下党承
旨碑陰有先生手蹟石刻云冠氏帥趙侯齊河帥劉
侯率將佐來游好問與焉丙申三月廿五日題 故

十二月鉛珍墓誌道南有仁宗時侍從龍圖張侍郎
揆讀書堂讀書堂三字東坡所書并范純粹詩石刻
至濟南又留二日汎大明湖待杜子不至明日行齊
河道中小雨後太山峯嶺歷歷可數前後得詩凡十
五首 八月十七日莘縣夢中詩

八年丙申

四十七歲 夏六月馮內翰文以某在冠氏枉駕見
過冠氏在河北
路大名府 東遊略記丙申三月二十一日冠

氏趙侯將會行臺公於泰安侯以予宿尚遊觀拉之

元遺山先生年譜卷三
三
偕行凡三十日往復千里而在鞍馬者八月故所歷不能從容因略記之郭巨廟在長清西南四十里所路傍小山之上齊武平中齊州胡僕射所造石室在焉所刻人物舟車馬象三壁皆滿衣冠之制絕與今世不同有如沈存中所記幞頭但不展脚耳西壁外胡僕射刻頌規制如磨崖狀字作隸書文齊梁體後題云居士慧朗侍從至朗能草隸書世謂朗公書者是也予意此頌必朗公所書故題字云然又有開元二十五年題字并長清尉李皋祭文隔馬祠在長清物譜末云丙申八月二十有二日洛州元氏太原房某引 東坡樂府集選末云丙申九月朔書於陽平寓居之東齋 南冠錄引云作詩今四十年矣蓋南冠錄當作於此年

九年丁酉

四十八歲 八月自大名還太原 遽然子墓碣云丁酉冬復來東州而遽然子下世矣

十年戊戌

四十九歲 秋八月二日別冠氏諸人二十二日入

濟源寓舍 十月山陽雨夜詩 千戶趙侯碑云予
往客平陽者六年歲戊戌七月以叔父之命將就養
於太原侯留連鄭重數日不能別軍行河平子與之
偕分道新鄉置酒行營中夜參半把燭相視不覺流
涕覆面 傷寒會要序戊戌之夏予將還太原 范
鍊師贊引云戊戌之夏予過東平留宿正一宮

十一年己亥

五十歲 己亥元日詩云五十未全老 正月二十
七日於濟瀆祠作老人星贊 續夷堅志云己亥夏

四月子自陽雲臺宮將之上方過天壇中巖洞 倪

莊中秋 十一月十三日雪晴夜半讀書山東龕看

月詩

十二年庚子

五十一歲 南菴杏花詩

十三年辛丑

五十二歲 閻侯墓表云辛丑元日子方客東平閻
載之盛爲具召子及大興張聖子祁人宋文卿東光
句龍英孺鎮人劉子新太原崔君卿渾源劉文季壽

春田仲德輩飲於家之養素齋所致客皆名士樂籍
又京東之舊飲既洽談謔閒作時客無不滿引舉白
十四年壬寅

五十三歲 正月九日詩自注時欲經營神山別業
夜宿讀書山詩五十三年等閒裏 元氏集驗方
序壬寅冬閑居州里錄子所親驗者爲一編目之曰
集驗方十二月吉日書於讀書山之東龕

十五年癸卯

五十四歲 癸卯歲杏花云讀書山前二月尾又云

今年閏年好寒節 四月二十一日病因食豬動氣

而作 臨錦堂記幕府從事劉公子裁其西北隅

城也爲小圃堂於其中名曰臨錦癸卯八月公子觴子

此堂 八月爲中令耶律公代作祭妣文 九月四

日同杜仲梁賦黃華山水篇 冬過趙州慶源館爲

范鍊師作太古堂銘

是年四月王若虛卒年七十先生作墓表云十月好

問拜公墓下 曹徵君墓表云君流寓宏州癸卯冬

子自新興將之燕中乃枉道過之 李君墓碑云癸

卯冬予自燕都還太原道出范陽

十六年甲辰

五十五歲 壽陽縣學記甲辰之春歸自燕雲道壽陽知有新學往觀焉 四月二十四日忻州郡守等天池祈雨文 夏五月積雨十餘日不止 兩山行記甲辰夏五月八日子以事當至崞縣初約定襄李之和偕往適幕府從事宣德劉惠之平陽李幹臣還軍官山過吾州遂與同行是日行八十里野宿天涯山前明旦入縣劉李別去予獨遊神清觀舊聞行臺

員外廣寧李純甫棄官學道築環堵而居聞予來欣然相迎卽日與純甫之和並山而東出雁門之南夜宿王仲章道正瑞雲庵庵在鳳山之麓道士孫守真年八十矣亂後無圖志可考山之故事多從此翁得之十一日入山半山一峯爲釣魚臺其上爲十八盤爲青龍嶺爲風門右爲來儀觀觀有天寶四載石記是道學士董思珍所造觀額政和七年九月兵馬鈐轄知代州王機建權發遣河東沿邊按撫司公事王誨書明日期城中諸公不至又明日爲前高之遊

秋留別丹陽詩西山西畔是并州 秋過寂通庵別

陳丈詩 吳君阡表云甲辰冬予過洛西

十七年乙巳

五十六歲 甲辰秋洛陽得黃葵子種之南庵明年

夏六月作花時方以病止酒 秋與梁辨疑李輔之

武伯佐游崑山祠 與樞判白兄書云乙巳歲往河

南舉先夫人殯首尾閱十月之久幾落賊手者屢矣

狼狽北來復以葬事往東平 冬十一月至東平過

聖與張君之新軒見武伯英所寶宣和湖石聖與名

曰雪巖乃爲之詩 馮君碑云乙巳冬好問過大名

十二月拜孔子林廟還得手植檜把握許就刻爲

宣聖顏孟十哲像而爲之贊

蒙古定宗元年丙午

五十七歲

二年丁未

五十八歲 袁君墓表丁未春芮城李邦彥過吾州

以文爲請 朝元觀記丁未春二月梁鍊師辨疑過

新興末云望日遺山真隱元某記 寒食歸自三泉

三年戊申

五十九歲 示程孫四首云明年吾六十 康君墓

表九月予過寧晉

四年己酉

六十歲 四月十七日度石嶺詩云無情石嶺關頭

路行去行來又十年 是年秋真定提學龍山趙國

寶資助錢中州集板行 八月為楊叔能小亨集序

云今年所誤小亨集成其子復見予鎮州方綱按先

生尚為楊叔能作序則歸潛志所謂叔能之詞云者

其亦可以無辨矣 曹君阡表己酉秋九月予以事

來燕都 跋毛氏家訓後己酉冬某自燕還幕府先生

夫人毛氏也

五年庚戌

六十一歲 忻州天慶觀重建功德記庚戌春二月

予還自鎮州 順天府營建記庚戌七月予過順天

方綱按順天即今保定府 八月為第四女擇配得

世官張氏長子興祖

蒙古憲宗元年辛亥

元遺山先生年譜卷三 九
六十二歲 夏五月以事來太原借宿大悲僧舍
常君墓誌辛亥九月晦日自太原東來過仲明之門
而仲明下世十餘日矣 續夷堅志辛亥秋予與毛
正卿德義仲昆郝伯常劉敬之諸人遊順天寶教院
寺僧說龍事 十二月十四日爲第四女配婿

二年壬子

六十三歲 十月遊承天鎮懸泉 東平賈氏千秋
錄後記云壬子冬十月自真定來東原顯之以此本
見示 冬與大興蕭漢傑相值於東原詩序云與漢

傑論余之行年而有契於心 嚴公祠堂碑壬子孟
冬公之嗣子走書幣及好問於鎮陽

二年癸丑

六十四歲 夏六月客燕中 致樂堂記癸丑之夏
余以事來故都 十一月賦西溪圖詩 濟南孫君
墓碑癸丑之冬予以行臺之召東來

四年甲寅

六十五歲 正月二十三日故關道中詩云六十復
半十 六月臺山雜詠 七月自清涼還太原中元

元遺山先生年譜卷三
日作嵩和尚頌序 九日遊龍泉寺 十二月四日
出鎮陽

五年乙卯

六十六歲 二月二十一日歸自汴梁二十五日夜
久旱而雨偶記內鄉一詩追錄於此今三十年矣

八月自鎮陽來東平 十一月往鎮州

六年丙辰

六十七歲 九月二十六日挈家遊龍泉 冬十月
閒居西山之鹿泉

七年丁巳

六十八歲 三月初二日張村杏花詩 尙藥吳辨
夫壽家記云丁巳秋七月子將西歸 密國公壽如
庵詩文集於公薨壬辰後二十有六年再刻於大名
門下士河東元某爲序 八月初作琴辨引未稱遺
山詩老 九月四日先生卒於獲鹿寓舍是年爲宋
理宗寶祐五年後三年庚申始爲蒙古世祖中統元
年元詩小傳云元世祖在藩邸聞其名將以館閣處
之未用而卒王鶚遺山文集後引云國朝將新一代

實錄附修遼金二史而首膺是選哀訃遽聞又中統三年李治序云主上曩居藩邸挹君盛譽一見遽以處之太史氏又壽陽縣學碑陰記中統初聖上龍飛挹先生文譽方欲選用而先生已下世矣

先生前配太原張氏再配臨清毛氏子男三人女二人郝經壽元內翰云遺山山頭有舊廬歸來亦足爲歡娛既有墮地風雲之驪駒又有竹花弄語之鷓鴣仰天一笑萬事足倒騎箕尾遊蓬壺此詩不著歲月先生移居詩有南榮坐諸郎之句則其時諸子皆已讀書矣移居詩亦不著歲月中有云我作南冠錄一語不敢私南冠錄成於甲午時年四十五而先生詩云四十舉兒子則己丑所生之阿干於時方六歲移居詩蓋又在甲午後也

移居詩云我作野史亭亭在今忻州南十里韓巖村墓銘云雜錄近世事至百餘萬言書未就而卒此則不止於南冠錄壬辰雜編矣壬辰雜編不著卷數中州集則家鉉翁題後亦稱十卷郝經墓銘則曰爲中州集百餘卷又有金源君臣言行錄亦不著卷數本

傳又載杜詩學一卷東坡詩雅三卷錦機一卷詩文
自警十卷而墓銘云詩至五千五百餘篇碑銘至百
餘首又有續夷堅志二卷今所傳詩文集四十卷一
刻於明宏治十一年再刻於 本朝康熙四十六年
皆頤齋張德輝類次之本粗分各體而時地則未嘗
一一細攷也

附錄

先生七歲能詩有神童之目學成下太行渡大河爲
箕山琴臺等詩禮部趙秉文見之以爲近代無此作

也於是名震京師有元才子之稱趙愚軒寄裕之詩
有矐元之號先生自題寫真有短小精悍之語

劉靜修詩百年圖籍有蕭相一代英雄誰蔡公策書
紛紛少顏色空山夜哭遺山翁自注汴亡張蔡公以
金寶錄歸遺山嘗就公謄錄

葛邏祿易之詩維時儒教師矯矯真天龍乾坤始開
廓魚水欣相從自注世祖嘗因金儒元好問之請爲
儒教大宗師

歐陽圭齋集近年奉詔修三史一日於翰林故府中

元遺山先生年譜卷三
三
攜金人遺書得元遺山裕之手寫壬辰雜編一帙
遺山續夷堅志二卷吳中王起善抄本至正二十三
年癸卯歲閏三月十七日丁亥華亭在家道人孫道
明明叔借鈔前有至順三年朱方石巖民瞻識云此
乃先生當中原陸沈之時皆耳聞目見之事非若洪
景盧讀史寓言也

靜樂舊抄遺山詩後世系畧云元氏本黃帝後自昌
意少子受封北國傳至後魏拓跋氏至孝文遷都洛
陽改元氏又傳七世而國祚移遂落籍汝州唐元結

官禮部侍郎五季後自汝州遷平定至先生高祖誼

宋宣和閒官忻州神虎軍使曾祖春隰州團練使靖

康末自平定遷忻祖滋善金正隆二年始仕爲柔服

丞所謂銅山府君也生三子長德明號東巖嘗讀書

東山福田精舍繫舟山在今忻州南三十五里趙乘
文詩山頭佛屋三五間山勢相連石

嶺關名字不經從我
改便稱元子讀書山累舉不第以詩酒自適先生貴

後贈中順大夫此所謂東巖府君也次格官陵川令

以遺山貴贈明威將軍所謂隴城府君也季升字德

清以兄隴城蔭補承奉班亦無子德明生三子長好

元遺山先生年譜卷三

古字敏之沒於貞祐二年元兵屠城之難次好謙字益之季即先生出繼叔父隴城君

遺山集四十卷附錄一卷明儲懽家藏本宏治戊午

泌州李翰為鈔諸梓有李治徐世隆二序後有王鶚

杜仁傑二跋凡詩十四卷文二十六卷集末附錄一

卷儲氏所輯也按先生入元不仕自是金源遺老長

洲顧氏選錄有元一代之詩乃以遺山冠於甲集之

首非知人論世之義也


元遺山先生年譜卷三

譚瑩玉生覆校

詩人元遺山先生墓圖

元譜附錄墓圖

一 國子雅堂叢書




五花墳者先生墓前舊有土五
方每方縱橫五丈五尺高二尺
相傳先生葬時四方來祭者張
棚帳於此畫花為記歷數百年
遺址如故父老猶呼為五花棚
地云

五花

五花

圍牆共計七十九丈七尺七寸



五花

五花

五花

韓巖村

元言附錄
懿歟元子歿五百年乾坤清氣積久逾宣汪君守土志
仰前賢政餘馮弔蔓草荒烟恤其後嗣擴以墓田斯文
炳耀義薄雲天前之司牧實未有焉風流如在俎豆長
綿閩中陳學穎贊

墓表

詩人元遺山之墓

碑陰

遺山先生文章行業海內所共知士大夫不敢僅以金
國百年論之者蓋以文派有所歸也噫與初嘗辱先生
教誨又嘗聞先生之言某身死之日不願有碑誌也墓
頭樹三尺石書曰詩人元遺山之墓足矣噫與初適按
部河東得拜墓下因買石以刻之先生有文集樂府行
於世至於大書特書有太史氏存茲不贅云先生諱好

問字裕之遺山其自號也至元十有九年五月廿二日
建

通議大夫河東山西道提刑按察副使魏初

大中大夫河東山西道提刑按察使濟南姜彧

乾隆五十九年七月知忻州直隸州事古歛汪本直重
建立石

元遺山先生墓碣

元郝經

歲丁巳秋九月四日遺山先生卒於獲鹿寓舍十日訃
至經走常山三百里已馬舁歸葬燕文酌酒哭於畫像
之前而已先生與家君同受業於先大父經復逮事先
生者有年義當敘而銘之詩自三百篇以來極於李杜
其後纖靡淫豔怪誕癖澀以弛弱遂失其正二百餘
年而至蘇黃振起衰路益爲瑰奇復於李杜氏金源有
國士務決科干祿置詩文不爲其或爲之則羣聚訕笑
大以爲異委墜廢絕百有餘年而先生出焉當德陵之

末獨以詩鳴上薄風雅中規李杜粹然一出於正直配
蘇黃氏天才清贍邃婉高古沉鬱太和力出意外巧縟
而不見斧鑿新麗而絕去浮靡造微而神采燦發雜弄
金碧糝飾丹素奇芬異秀洞蕩魂魄看花把酒歌謠跌宕
挾幽并之氣高視一世以五言爲雅正出奇於長句
雜言至千五百餘篇爲古樂府不用古體特出新意以
寫怨思者又百餘篇用今題爲樂府揄揚新聲者又數
十百篇皆近古所未見也汴梁亡故老皆盡先生遂爲
一代宗匠以文章獨步幾三十年銘天下功德者盡趨

其門有例有法有宗有趣又至百餘首爲杜詩學東坡
詩雅錦機詩文自警等集指授學者方吾道壞爛文曜
瞠昧先生獨能振而鼓之揭光於天俾學者歸仰識詩
文之正而傳其命脈繫而不絕其有功於世又大也每
以著作自任以金源氏有天下典章法度幾及漢唐國
亡史興已所當爲而國史實錄在順天道萬戶張公府
乃言於張公使之奏聞願爲撰述奏可方闢館爲武安
樂夔所沮而止先生曰不可遂令一代之美泯而不聞
乃爲中州集百餘卷又爲金源君臣言行錄往來四方

采摭遺逸有所得輒以寸紙細字親爲記錄雖甚醉不
忘於是雜錄近世事至百餘萬言捆束委積塞屋數楹
名之曰野史亭書未就而卒嗚呼先生可謂忠矣先生
諱好問字裕之太原秀容人系出拓跋魏故姓元氏曾
大父春忠顯校尉隰州團練使大父滋善儒林郎銅山
府君贈朝列大夫父格顯武將軍鳳翔府路第九處正
將兼行隴城縣令騎都尉河南縣開國男食邑三百戶
妣河南郡太君王氏先生七歲能詩太原王湯臣稱爲
神童年十一從叔父官於冀州學士路宣叔賞其俊爽

教之爲文年十有四其叔父爲陵川令遂從先大父學
先大父卽與倡和或者譏其不事舉業先大父言吾政
不欲渠爲舉子爾區區一第不足道也遂令肆意經傳
貫串百家六年而業成下太行渡大河爲箕山琴臺等
詩趙禮部見之以爲少陵以來無此作也以書招之於
是名震京師目爲元才子登興定五年進士第不就選
往來箕穎間數年而大放厥辭於是家按其什人嚼其
句洋溢於里巷吟諷於道塗巍然坡谷復出也初筮除
鎮平令再轉內鄉遂丁艱憂終喪

方綱按此處敘次有
誤愚於年譜詳之矣

考陵川集本
無此十六字

正大中辟鄧州南陽合南陽大縣兵民十
餘萬帥府令兼鎮撫甚有威惠詔爲尙書都省掾居無
何除左司都事再轉爲中順大夫行尙書省左司員外
郎兼修起居注上騎都尉河南縣開國子食邑五百戶
賜紫金魚袋天興初入翰林知制誥金亡不仕而卒春
秋六十八某年月日葬於秀容之先塋前配同郡張氏
戶部尙書林卿之女再配臨清毛氏權貨司提舉飛卿
之女子男三人長曰拊奉直大夫汝州知州兼管諸軍
奧魯勸農事次曰振仕至太原路參佐次曰摠尙書都

省監印女五人長曰真適進士東勝程思温次嚴女冠
詔爲宮教號浯溪真隱次順早卒次適成和郎大都惠
民司提點太原翟國才次適建德路織染局大使定襄

霍維祖

銘曰士子賈技爭綴緝僥倖寸祿奔走急以爲詩文作
無益糞壤擲棄明月璧先生卓犖有異識振筆便入蘇
黃室開闢文源翦荆棘大聲復完金玉擊爛漫長醉思
盈溢瑞錦秋花亂堆積險妬護前喘肝臆羣犬銑銑共
讒嫉塵埃野馬爲鬼蜮遺山巖巖倚天壁國史興喪是

吾職義烈不負董狐筆定襄高寒拓跋國馬鼻歸來反
元宅有書有傳俱未卒嗚呼先生端可惜嗚呼先生不
可得

大德四年七月吉日男奉直大夫汝州知州兼管諸軍
奧魯勸農事元拊并元振立石

乾隆五十九年七月知州事古歛汪本直重摹勒石

附錄長洲顧氏元百家詩甲集小傳

遺山先生元好問字裕之太原秀容人七歲能詩有
神童之目年十四從陵川郝天挺學六年而業成下

大行渡大河爲箕山琴臺等詩禮部趙秉文見之以

爲近代無此作也於是名震京師謂之元才子金宣
宗興定五年登進士第不就選往來箕穎者數年除

南陽令調內鄉

方綱按此亦誤
愚於年譜詳之

歷尚書省掾左司都

事員外郎天興初入翰林知制誥金亡不仕元世祖
在藩邸聞其名將以館閣處之未用而卒年六十有
八世稱遺山先生先生天才清贍邃婉高古沉鬱太
和力出意外巧縟而不見斧鑿新麗而絕去浮靡雜
弄金碧綵飾丹素奇芬異彩動蕩心魄以五言爲雅

正而出奇於長句雜言樂府不用古題新意特出歌
謠慷慨挾幽并之氣晚年尤以著作自娛謂金源氏
實錄在順天張萬戶家國亡史興已所當任乃言於
張願爲撰述人或沮之先生曰不可使一代之迹泯
而不傳乃構亭於家名曰野史采摭所聞以寸紙細
字輒爲記錄至百餘萬言世所傳者詩文集外有中
州集壬辰雜編及杜詩學東坡詩雅錦機詩文自警
等書自中原板蕩風雅道衰汴京之亡故老都盡先
生蔚爲一化宗工以文章獨步者幾三十年由是學

者知所指歸作爲詩文皆有法度百年以還名家輩
出別裁僞體溯流窮源論者以先生爲標準不亦宜
乎

方綱按顧俠君以先生詩入元詩選於先生終始
仕金不仕元之義有所未合附辨於此

遺山先生世系略

先生姓元氏諱好問字裕之號遺山按國史本黃帝之後自昌意少子受封北國傳至後魏道武於東晉安帝隆安二年稱帝於平城乃以拓拔爲氏傳六世而至孝文遷都洛陽始稱元氏又傳七世而國祚移遂落籍汝州迨唐代間多爲顯宦惟元次山爲禮部侍郎清愛名世冠絕一時五季後從汝州遷平定至高祖誼於宋宣和間爲忻州神虎軍使曾祖春爲隰州團練使及靖康末金據中原不仕乃從平定遷忻郡

五季以後至此見遺山文集自註

祖滋善稱銅山府君於金正隆二年始仕為柔服丞遺山

貴後贈朝列大夫見南冠錄生三子長德明號東巖嘗讀書東巖之

福田寺累舉不第以詩酒自適生平多所著述遺山貴後贈中

順大次格稱隴城府君仕至陵川令遺山貴後贈明威將軍無子

季升字德清以兄隴城蔭補承奉班亦無子德明生三

子長好古字敏之習舉業沒於貞祐二年元兵屠城之

難次好謙字益之季即遺山甫生七月即出繼叔父隴

城七月出繼見南冠錄故遺山凡稱德明處不曰父而曰先人先

大夫先東巖君稱隴城處不曰叔父而亦曰先人先大

夫先隴城君

刺史汪公既修遺山先生墓復博求先生遺文於靜

樂故家得舊抄先生詩并此世系略一則今摘出附

刊於此督學使者河間戈源識

重修元遺山先生墓記

國朝古歛汪本直守愚

甲寅孟陬于役郊南薄暮道出韓巖村舊聞遺山先生墓在其處詢之土人導而前曰此五花墳也翁仲羊虎猶存呼燈展拜荒榛間有斷碣大書詩人元遺山之墓七字心竊異之越數日復往視碣陰文尙完可讀始知至元間先生弟子魏初姜彧二人述先生遺命而表石者夫先生仕於金秩顯矣不書乃書詩人想見先生以斯文自任者重而身食周粟心繫殷墟并不欲冠以時

代其用意尤深且悲也墓左一碑剝甚卽郝氏伯常所撰墓銘稱先生以丁巳歲卒爲蒙古憲宗七年計金亡已廿四年而碑之立則在成宗大德四年爲先生子拊知汝州時所建蓋上距先生之歿又四十四年矣又按碑稱先生卒於獲鹿旅舍歸葬秀容之先塋今先生墓石上下凡六冢皆無表誌遍訪故家得世系略一墓圖一乃以本集注暨南冠錄諸書證之元氏自五季後從汝州遷平定先生之曾祖春隰州團練使靖康末從平定遷忻祖滋善仕金爲柔服丞父德明卽金史所稱東

巖先生生三子先生其季生七月而爲叔後叔隴城君名格仕陵川令今其上四冢乃先生之曾祖與祖暨東巖隴城兩君墓下二冢則先生之子名拊孫名若祖墓也余維先生節槩文章彪炳史集固無待於闡揚惟是先賢一坏土歲久蕪廢亦守斯邦者責也遂練日鳩工厚墓垣崇墓封植松檟以蔭之碣斷者甃磚護之碑剝者礮石重鐫之計捐俸三百有奇三閱月而工竣垣之址則前牧秉方伯朱公命規墓域而始築者顧今甫二十年頽圯幾無存余又焉知後之視今不猶今之視昔

耶不有守冢奚以禁樵蘇不有歲修奚以資補葺乃更求其裔於元家山從田間得二人爲叔姪行問其世數不能詳也姪方卯頗聰俊因名之曰學詩給膏火屬州之廣文課之於是鬻序諸生僉進而言曰前之役公旣獨任之茲願共襄所以貽後者不兩月而輸得五百緡余喜曰可矣爰就墓前建享堂三楹而以世系略及墓圖勒石嵌諸壁別於道旁築數椽重書野史亭額標之復舊蹟也就近置墓田三千畝丙舍五間俾學詩之叔紹玉經理之今而後學詩讀於斯其叔耕於斯歲時祭享掃除恒於斯世世子孫守冢可勿替余倡是舉而都人士慕義之風莫不勉焉殆先生默有以相之歟時董其事者進士張君金龍舉人張嗣良康黃中貢生張象樞任元信也

校刊元遺山先生墓碑記文墨本跋

國朝 河間戈源 仙舟

於戲使君表章先賢之功蓋與先賢名並不朽矣憶予少時讀金史中州集輒穆然遺山先生之爲人逮試忻日檢生童名冊無元姓應試者詢之諸生且不知先生爲鄉前輩爰悵然者久之今得使君表章益信潛德幽光久而不闕且俾予數十年向往之忱一旦藉以得慰載讀使君所作記文又欣然以起舞也使君表章之勤之密具見所作記文中使君不以予爲不文凡三易稿

以示予予特慮世之景慕遺山先生者不盡能瞻拜松
楸卽無以悉先賢顯晦始末爰舉所寄碑文記文哀作
一編梓爲墨本傳之同志俾共知賢使君稽古之力也
將付梓爲跋其後乾隆乙卯閏二月督學使者河間戈
源跋

附跋

乾隆乙卯冬代州馮百史司務以古愚汪刺史重修
遺山先生墓記略來屬賦詩方綱因以舊所輯遺山
先生年譜附綴於後汪侯嗜古懷賢不以荒陋見嗤

遂付梓爲上下二卷并以同人詩依所得前後次第
刊於前卷之後而此後續詠者行將增刊以志弗諼
云嘉慶元年歲在丙辰春三月朔北平翁方綱識

忻州刺史守愚汪君重修元遺山先生墓詩

韓城王杰惺園

夙詠琴臺藻自嫺晚成樂府振雕孱百年史拾滄桑後
一代文留楮墨間碣表詩人標素節塋修良牧慰賢關
秀容樹色青無極披髮騎麟乍往還

獻縣紀昀曉嵐

中州文獻迹猶新寒食年年細草春一種風流堪溯處
當塗今葬謫仙人

平生忠憤寄荒邱五百年來片石留勵俗懷賢無限意

欲將棠蔭比松楸

大興翁方綱 覃溪

先生歿後五百年饗堂鼎建崇其阡守愚汪侯知政本
此舉無愧於前賢繪圖作記寄示我我嘗從事年譜編
鈔詩分訂顧秀塾磨碑漫記劉神川繫舟巖屋不可到
野史亭址誰留連今者披圖宛瞻拜墓門東北圍墻壞
其堂三楹壁嵌石厚培兩序增新椽大書中州文獻字
萬古奇氣光星躔堂前石人後墓道舊銘石乃堂東偏
巋然特表詩人墓先生之志藉以宣其西孫曾祔祖考

東巖隴城同氣聯五花之土土五丈葬時故事今猶存
亭仍重築署野史幽窻疎雨疑潺潺耕讀還因起丙舍
絃誦聲來遠墓田更因校刊先生集故家寫本尤精研
是與年譜相印合使我狂喜磨丹鉛燕趙慷慨悲歌氣
金元著錄金石鐫一於先生詩中寓杜老之史坡之仙
我寶先生兩石墨靈巖蹟並蘇門懸亟書汪侯名不朽
郝經姜魏同墨緣寄書謝子共礱石附諸集譜垂綿延
送迎神曲我其職春秋禮祀配管絃

白山法式善 梧門

嘗讀金源詩三復中州集知人兼論世不徒肄業及維
時風雅衰滄海橫流急遺山乃崛起身障狂瀾激我欲
拜公靈臨風一涕泣

峩峩五花墳榛莽掩碣石初或亦已遠何人訊遺跡卓
哉賢刺史力衍詩人澤幽泉發古香荒苔散寒碧至今
野史亭猶有讀書客

薄田三十畝茆屋八九間荷鋤徂南陌紅日暄東山野
草茁芄芃好鳥鳴關關時有吟嘯聲樂此農力閒更當
候明月伴爾松根還先生倘有知應破鏡中顏

用遺山詩句

南滙

吳省欽

白華

東巖先生有才子十四從師蔚雲起箕冢如陪司馬登
琴臺更悟成連子內鄉作合又南陽輾轉頭銜換省郎
族望共傳元魏始宗祊旋報蔡州亡代馬哀嘶常向北
糞火柴門闕聲迹餘燄長爭老杜光橫流那論長公格
錦機織出綺羅工恩怨分明溯國風甲子編年真寂寞
幽并吐氣最沉雄金源文物傳金匱寸紙駢聯歸睹記
實錄空藏萬戶家新朝尙采千秋事生平依約似東坡
衰草斜陽樵牧過遺書直壓猗玗上考姓還憐拓跋多

汪侯懷古心常惻爲表孤墳置白石遺民似說是兒孫
好句誰能圖主客中州文獻劇飄零名節如公照日星
五花要認詩人墓一笠應添野史亭

南滙 吳省蘭 稷堂

材官曾拜通明殿負弩金書夢中見

本先生記夢詩

仙人端合

作詩人天教疏鑿開生面落日青山望宋州故宮禾黍
幾經秋可憐枝上啼鶻血白髮纍臣萬斛愁桑榆歸夢
并州路田園乞得身閒住繫舟山是讀書山幽棲好傍
先人墓

見先生初挈家還讀書山詩

滄海橫流萬國魚

用先生句

獨留石

碣表荒墟大書特書者誰子學詩弟子或與初冢上年
年芳草綠表章遺蹟推賢牧舊本詩搜渤海藏前聞系
證南冠錄松楸無恙鬱蒼蒼一帶繚垣映夕陽五花棚
側石人語披髮精魂下大荒碑字重摹看屹立野史名
亭誌新葺使君盛舉照千秋同垂不朽中州集

靈石 何道生 菊人

晉國畸人元裕之金源文獻獨維持興亡盡入詩千首
磊塊難消酒百卮一代典章誰信史中州壇坫此雄師
浣花心事坡翁筆那信成都有舊祠

寧化 伊朝棟 雲林

金源有詩人文采兼亮節瓣香紹坡谷夕秀啓虞揭同
時李汾與辛愿頰首敢頡頏孤臣念君國白雪盈華髮

青城閱古今

先生癸巳出京詩云興亡誰識天公意留著青城閱古今

日望蔡州泣

西園與岐陽誰向蒼蒼說國亡不復仕著書自怡悅遺
墓傍五花七字表荒碣閱世五百年白楊風淒咽殘碑
牛礪角華表採樵折畊稼魏公莊後嗣誰撫卹忻州值
賢牧異代弔往哲新營文獻祠杞菊薦蠲潔吾讀中州
詩仰止先生切賸欲驅車遊遺像晉拜謁振衣野史亭

憑眺延山月悵望寄千秋此願空蘊結

武進 趙懷玉 味辛

先生生及明昌世眼中猶見承平事灑淚那堪晚境非
關心獨重名山寄金源文獻多沉淪手輯言行傳君臣
乾坤一亭號野史身後但願稱詩人白骨幾添兵死鬼
黃金甲第俱流水先生也算地行仙詩卷長留靈不毀
只今寂寞韓巖村翁仲無言落照昏過客誰澆一杯酒
居民空說五花墳使君下馬心香肅入夜呼燈把碑讀
松檟重教護墓田雲初還遣依祠屋好向當塗遍致詞

表章風雅即吾師荒原多少無名冢恐有人如元裕之

遂寧張問陶 船山

為表詩人墓重開野史亭祠堂增肅穆翁仲亦英靈孫

遠修家祭碑殘補舊銘韓巖村下路雲簇眾山青

靜樂李鑾宣 石農

南渡朝廷小中州野史尊在茲文不墜直筆道猶存枯

樹村鷓鴣荒阡石獸蹲墓田餘劫火五色尙留痕

馬鬣憑誰翦韓巖宿草中金源有遺老曠代仰宗風節

比陶元亮詩如陸放翁橫流滄海急巨筆補天工

祖研篋難守父薪肩未任韋編歸册府松檟蒼繁林舊鈔

遺山詩集每首下注作詩歲月較世行本為詳先大父中憲公所藏書余家故物也余索米長安離里門幾及二十年未曾目睹此本今為守愚先生購去緣是重葺遺山墓表兄馮仲匄學博來京師為余詳言之余聞是舉既歎祖研之不能守而又深喜官茲土者表章先賢之功不朽云俎豆自千古瓣香惟此心後之司牧者視昔準於今

長洲王芑孫 楊甫

計生獨拜茂秦墓宋公重築伯虎墳近人豔誦此二事

風流繼見今汪君汪君為吏果儒雅遺山冢前肯下馬

摩挲斷碣補全文收拾頽垣易新瓦遺山身涉金元際

百年文獻身孤繫野史亭前補舊聞中州集外存餘例
黑龍江黑龍飛久文武英雄事粗有趙家片土太淒涼
天留此筆遺山手一代文章不採窮飢寒奔走亂離中
女兒避兵身落拓鄧州懷古意沉雄生前掩袂死霑巾
著錄猶存日月新明昌以後誰爲質虞范前頭要此人
詩人從古無高寵何況區區死土壟馬兒歸來麥飯虛
牛眠難保松楸拱汪君按部每遺址更訪孱孫讀書史
隻雞絮酒儼生平掛劍燒錢若新死人生旦暮成今古
人鬼幽明一風雨李白青山尙墓田杜陵灤水還祠宇

此風牢落誰能嗣此事傳聞正須志眼底文人感絡邱
九原隨會吾揮淚青雲黃土世悠悠吾輩終當老一杯
因君不覺重懷古多少蒼苔白骨秋

金谿 楊 護 柏溪

西園載酒催行舟中原人物無其儔河朔銅馬成遺恨
婆娑老樹搖清秋先生精神未泯滅應翳白鳳青都遊
不爾下界或重獻五花土淨千崖幽城郭人民劫灰後
巋然片石高林陬我讀遺書頻太息英雄事去如浮漚
東闕蒼龍西玉虎朝虞暮號幾曾休白髮累臣故國淚

苦才多思

本元詩

窮雕搜野史亭孤晚更作遺文考撫徵

無由滄海橫飛此身在大河東注無還流暮雲樓閣自
今古畫蘭桂樹空夷猶眼底熙春如夢寐蘭成賦罷徒
幽憂十二修眉眉色好天池一洗塵埃收萬古斯文齊
石室衣冠蛻處夫何求兩序厚培埏隧密三楹中煥墻
塹周銘辭舊鐫亭再築誰其舉者今汪侯汪侯政清有
餘暇金石著錄懷前修放翁草庵劍南外少陵江閣天
西頭偶然羈旅尙不廢矧乃魂魄長棲留韓巖村古卽
其地以時設禮蘋蘩羞繪之以圖繫以記使我瞻拜心

神悠金爵銅駝付憑弔雪香雜咏時吟謳君不見程嬰
之墳忠襄墓寒煙落日橫忻州

元譜附錄

譚瑩玉生覆校

右元遺山先生年譜三卷附錄墓圖記畧一冊年譜

國朝翁方綱撰案先生仕履已見前遺山才雄學贍金
元之際屹然爲文章一大宗先生石洲詩話稱其崛起
党趙之後開啓百年來文士之脈又稱其七言歌行真
有牢籠百代之意陸務觀所不能到又稱其所謂乾坤
清氣隱隱自負居然有集大成之想其推許已極作爲
年譜考訂綦詳癸巳崔立作亂羣小爲建功德碑一事
實遺山一生名節所關辨之不遺餘力然遺山金人也
顧俠君選詩且以元人相目是非毀譽之來原聽之悠

元遺山先生年譜
一
悠之口是在知人論世者折衷之耳石洲詩話第七卷
註遺山論詩絕句三十首丁丑歲三鄉作金宣宗興定
元年云云卽譜中語末云遺山集訛字極多須得宏治
沁州原刻本校勘重刻以拙撰年譜附後又云凌仲子
亦嘗撰先生年譜手稿在余篋可併採錄也云云凌仲
子旣有所作而先生復爲之或嫌其援據之未審歟抑
書成而始覲之也凌氏撰遺山年譜亦見阮文達國
史儒林傳稿而今殆不存矣是書原無卷數釐爲三卷
重刻之俾讀遺山集者有所考焉刻成適得汪古愚刺

史所輯墓圖記畧一冊先生跋稱以年譜附綴於後殆
原相輔以行者也亟附錄焉咸豐乙卯立秋後三日末
伏南海伍崇曜謹跋

元道州先生言

三



